

– Տանում եմ «աստծու մարդու» համար, – պատասխանեց նա հանդարտ կերպով:

– Ո՞վ է «աստծոյ մարդը»:

– Նա գրում է թիլիսմաններ, եւ որ տղային սիրում է աղջիկը, նրան բերում է այն աղջկայ համար:

– Ուրեմն դու սիրո՞ւմ ես մէկին:

– Ահմէի որդի Սաֆօին: Նա մի քաջ որսորդ է:

– Իսկ այդ գառը քո հօր հոտի՞ցն է:

– Ես նրան գողացայ ճանապարհին գալու ժամանակ:

– Երեւի, հայերի ոչխարներից: Այդպէս չէ՞:

– Բա՛ որտեղի՞ց: Քրդի գառը ես չեմ գողանայ:

– Հեռո՞ւ է քո հօր չադրը:

– Խանա-սորի այն կողմը: Ես այնտեղից դուրս եկայ, երբ լոյսը դեռ չէր ծագել: Հայրս չիմացաւ:

Աւելի քան երեք մղոն ճանապարհ էր եկել քրդուհին: Նա նայեց դէպի վեր, տեսնելու թէ արեւը որտեղ էր կանգնած եւ շարունակեց իր ճանապարհը, ասելով.

– Ես հեռու պետք է գնամ. «աստծոյ մարդը» կենում է այստեղից շատ հեռու. տե՛ս, այն կապոյտ սարերի մէջ: Թէ մի օր կը պատահի քեզ անցնել Խանա-սորի ձորով, հարցրու այնտեղ Գիւլիի հօր չադրը, նրան կոչում են Ռահմանի որդի Ռահիմ. նա Բիբլասների ցեղապետն է: Գիւլին շատ սիրեց քեզ, դու օգնեցիր նրան:

Քո աչքերը նմանում են նրա Սաֆոյի սուրմայած աչքերին: Գիւլին հանգստութիւն կը տայ քեզ իր հօր չադրում, մի ամսական գառը կմորթէ քեզ համար:

Ես կամեցայ գեղեցիկ քրդուհու քաղցրախօսութեանը պատասխանել նոյն ոճով եւ ասացի.

– Բայց Գիւլին նմանում է քեաֆար գիւլի (մուգ-ծիրանի գոյն ունեցող վարդի):

Քրդուհի օրիորդի գորշ, բայց սիրուն դեմքի վրայ փայլեց մի ժպիտ, նա երեսը շուռ տոեց, շարունակեց իր ճանապարհը, ասելով.

– Աստուած կը տա՛յ ինձ մի օր, որ կը սպանեմ այն սատանայի քածին... Նա ցոյց տոեց Մարօի վրայ եւ հեռացաւ: